

## Dä Schütz und sini Gedanke ..

D'Sicht isch klar – und s'hätt kan Wind – schöö rund isch au äs Schiibebild –  
Dä Puls isch ruhig – dä Schnuuf ganz flach – etzt goht dä Schuss – än luute Krach.

Dä Monitor zagt's a - e Zehni – än guete Schuss – maant au de Fredi.  
Wänn's no bim nöchschte au so bliibt – dä Schütz isch aagspannt zielt und zielt ..  
und - wie chönd's äacht anderscht sii – de nöchshti Schuss goht wiit verbii...  
Dä Schütz de flueched vor sich hie – wieso isch dä nid dine g'sii??

Etzt haast's ufpass, zämeraffe – guet aaluege - nid abriise – nomel i de Kampf iigriife –  
S'Chlöpft und rücht – s'isch au ka Wunder mit däm moderne Plastikplunder –  
und - lueg - etzt hätt er troffe - und sin zweite Zehner g'schosse!  
Im Schützehuus isch's etzt ganz still – kane wo chli störe will!  
Äs Resultat isch äbe Wichtig – jo - bi üüs scho fascht Verpflichtig –  
susch bisch ewäg im Johresstich – und da wurmt jede – Fürchterlich!

\*\*\*\*\*

Isch's nid im Läbe auch chli Mode – nur wär guet isch - bliibt ganz Obe?  
Dä cha absahne – cha brillierä und au mol ganz gross Jubiliere.  
No di ganz Guete sch'tönd i de Ziitig – im Sch'portteil immer ame Friitig.  
Dä Sch'port cha egoistisch mache – s' goht no um Leischtig – d'Schpitze schaffe.  
Wär hine aastoht isch verbii – würd nüme bi dä Beschte sii.  
Dä Sch'pott dä tuet dänn dopplet weh – d'Chranzkarte chasch au nüme neh –  
au wänn't än Punkt dernäbed bisch – so isch dä Chranz scho wäg vom Tisch.

So isch's im Sch'port und au im Läbe – äs Glück goht halt ganz eign'i Wäge –  
Nid jede wo sich all Tag plooged – isch i dä G'sellschaft immer g'froged.  
Und schnäll, ganz schnäll bisch nümm derbii – chasch nümme bi de Spitze sii.  
Dänn isch äs Ziit – au mol chli z'Dänke – und sich ä paar Minute schänke!

## Dä Schütz und sini Gedanke ..

Wa isch etzt Wichtig – wa mach'sch falsch – worum dä Brocke etzt im Hals?  
Aen neue Abschnitt fangt etzt a- s'isch au egal - öb Frau ob Maa –  
etzt mömer üüs neu orientiere – nid lamentiere - chli sch'tudiere.

\*\*\*\*\*

Ezt haast's halt - chlini Bröötli bache – z'friede sii und au mol lache.  
d'Fründe pflege, positiv danke und viel'ne Mänsche wärmi schänke...  
Isch's au bloss äs fründlich's Wort – bisch immer gern g'seh a jedem Ort  
verteilsch chli Freud' und au Humor – da öffnet mängsmol Tür und Tor...  
Wär hütt soo cha dur's Läbe gho - würd jede Sch'turm guet überschoo.

\*\*\*\*\*

Dä letschti Schuss isch etzt verhallt – es hätt grad nomel mächtig k'nallt –  
Dä Schütz rumt z'friede sini Sache - etzt cha au er mol wieder lache.  
Und plötzlich würd's em sunneklar - äs Läbe isch doch wunderbar -  
wännt au mol nid de Bescht bisch - und da nid bloss bim Schüsse -  
äs Läbe cha me troztdäm g'nüsse!

\*\*\*\*\*